

आकाशवाणी जयपुर-अजमेर  
प्रादेशिक समाचार  
दिनांक : 12.01.2026 समय : 18.45 बजे

खास समाचार

- प्रदेश मांय स्वामी विवेकानंद री जयंती राष्ट्रीय युवा दिवस रे मौके न्यारा-न्यारा कार्यक्रम व्हेला- जयपुर मांय राज्य स्तरीय जळसा मांय मुख्यमंत्री भजनलाल शर्मा एक लाख सरकारी भर्ती रो कैलेण्डर जारी कर्यो
- केन्द्रीय बजट 2026-27 आवती 1 फरवरी दीतवार ने लोकसभा मांय पेश कर्यो जावेलं
- राज्य मांय केई ठौड़ां माथे शीतलहर चालबा सूं कड़ाका री ठण्ड रो दौर-13 शहरां मांय पारो 5 डिग्री सेल्सियस सूं नीचे
- जयपुर मांय 14 जनवरी ने "काइट फेस्टिवल" राख्यो जावेलं

000

स्वामी विवेकानंद री जयंती ने राष्ट्रीय युवा दिवस रा रूप मांय मनायो जावे हैं राष्ट्रीय युवा दिवस रे मौके राज्य स्तरीय महोत्सव जयपुर रा एसएमएस स्टेडियम मांय राख्यो गयो मुख्यमंत्री भजनलाल शर्मा महोत्सव ने संबोधित करता थकां कया के युवा शक्ति हर युग मांय राष्ट्र री दिशा बदली हैं इण मौके श्री शर्मा नई युवा नीति-2026, रोजगार नीति अर सरकारी भर्ती कैलेण्डर जारी करयो इण रे सागे ही मुख्यमंत्री युवा स्वरोजगार योजना री सरुआत भी करीं वणा इण मौके युवावां ने यूथ आइकॉन अवॉर्ड सूं सम्मानित भी कर्यां मुख्यमंत्री कया के नुवी नीति सूं मोट्यार मजबूत बणेलां वणा कया के स्वामी विवेकानंद भी मोट्यारा ने राष्ट्र बणावण खातर सेवा सूं जुड्बा ने कया हां वणा कया के राज्य सरकार युवावां ने आगे बढाबा खातर हर भांत री कोशिश कर री हैं

मुख्यमंत्री

राष्ट्रीय युवा दिवस माथे प्रदेश रा दूजा जिलां मांय भी न्यारा-न्यारा कार्यक्रम व्हीयां राष्ट्रीय युवा दिवस माथे कोटा मांय व्हीया एक कार्यक्रम मांय राज्यपाल हरिभाऊ बागडे कया के स्वामी विवेकानन्द व्यक्ति ने दृढ संकल्प कर निडरता सूं आगे बढबा री प्रेरणा दीं वे कया के स्वामी विवेकानन्द मोट्यारा ने संदेश दियो के वे आत्मविश्वास रे सागे जीवन मांय कोई भी लक्ष्य हासिल कर सके हैं श्री बागडे कया के जीवन मांय सकारात्मक विचार राखणो जरूरी है, विचार ही भविष्य रो निर्माण करे हैं वणा इण मौके सामाजिक सेवा रा हलका मांय चोखा काम करबा वाळी कोटा री 31 संस्थावां ने सम्मानित कर्यां राष्ट्रीय युवा दिवस रे मौके जोधपुर मांय रन फॉर स्वदेशी राखी गई नया भारत का संकल्प-स्वदेशी और स्वावलम्बन थीम माथे राखी इण दौड़ ने जोधपुर सर्किट सूं शिक्षा अर पंचायतीराज मंत्री मदन दिलावर हरी झंडी दिखा र रवाना कर्यां रन फॉर स्वदेशी मांय जोधपुर शहर रा हज़ारों पढणियां इण मांय भाग लीनां इण मौके जोधपुर मांय जिला स्तरीय युवा संबल मेळो भी राख्यो गयो मेळा मांय 20 न्यारा न्यारा हलकां री 70 सूं बत्ती कम्पनियां मोट्यारा ने रूजगार रा मौका दीनां बडी संख्या मांय मोट्यार इण मांय पंजीकरण करा र साक्षात्कार प्रक्रिया मांय भाग लीनां कार्यक्रम रे दौरान प्रभारी अर शिक्षा मंत्री मदन दिलावर न्यारी-न्यारी योजनावां रा लाभार्थियां ने प्रमाण पत्र अर इमदाद राशि रा चैक दीनां

इण मौके युवावां सूं स्वरोजगार अर कौशल विकास योजनावां रो बत्ता ऊं बत्ता फायदो उठाबा ने कह्यो कार्यक्रम मांय मुख्यमंत्री श्री शर्मा वीडियो कॉन्फ्रेंसिंग रे मार्फत मोट्यारा ऊं सीधी बातचीत करीं पाली मांय नौजवान स्वामी विवेकानंद री मूरत माथे फूल चढायां सागे ही सड़क सुरक्षा री शपथ लीनीं

वठी ने एक निजी कॉलेज मांय भाषण अर निबंध होड भी राखी गई बाड़मेर मांय स्कूलां मांय केई कार्यक्रम व्हीयां भरतपुर अर सलूमबर मांय स्वदेशी संकल्प दौड व्ही

000

केंद्रीय बजट 2026-27 आवता म्हीना री पहली तारीख, रविवार ने लोकसभा मांय पेश कर्यो जावेलां संसद रो बजट सत्र इण म्हीना री 28 तारीख सूं सरू व्हे र 2 अप्रैल तांई चालेलां लोकसभा अध्यक्ष ओम बिरला आज नुवी दिल्ली मांय खबरनवीसां रा सम्मेलन मांय एक सवाल रा जवाब मांय बतायो के सदन मांय बजट पेश करबा री प्रक्रिया पहली फरवरी ने संवारे 11 बज्यां सरू व्हेलां बजट सत्र रो पहलो दौर 28 जनवरी सूं सरू व्हे र 13 फरवरी तांई चालेलां सत्र रो दूजो फेर 9 मार्च सूं 2 अप्रैल तांई व्हेलां

000

राष्ट्रमंडल संसदां रा अध्यक्ष अर पीठासीन अहलकारां रा 28वां सम्मेलन-सीएसपीओसी 14 जनवरी री मेजबानी करेलां तीन दिन रो ओ सम्मेलन 16 जनवरी तांई चालेलां ओ सम्मेलन साठ सूं बत्ता राष्ट्रमंडल देश अर अर्ध-स्वायत्त संसदां रा अध्यक्ष अर पीठासीन अहलकारां ने एक मंच देवेलां नई दिल्ली मांय खबरनवीसां सूं बातचीत मांय लोकसभा अध्यक्ष ओम बिरला कया के पहला दिन कार्यकारी परिषद री बैठक व्हेलां वे कया के संसद मांय आर्टिफिशियल इंटेलिजेंस रा इस्तेमाल, सांसदां ने सोशल मीडिया रा असर, संसद अर सुरक्षा, स्वास्थ्य अर सांसदां रा आरोग्य री सार्वजनिक समझ बढ़ाबा समेत केई विषयां माथे सम्मेलन रे दौरान सत्र राख्या जावेलां श्री बिरला कया के ओ महताऊ कार्यक्रम भारत री लोकतांत्रिक अर संसदीय यात्रा मांय ऐतिहासिक भागीदारी अर एक गौरवशाली क्षण ने दरसावे हैं

000

प्रदेश मांय न्यारी-न्यारी ठौड़ां माथे शीतलहर चालबा सूं कड़ाका री ठण्ड रो दौर चाल रहयो हैं सीकर रा फतेहपुर मांय आज दूजा दिन भी पारो शून्य सूं नीचे दर्ज कर्यो गयो इण रे अलावा पारो बीकानेर रा लूणकरणसर मांय शून्य दशमलव चार डिग्री सेल्सियस रियो श्रीगंगानगर, चूरू, जैसलमेर, झुंझुनूं, दौसा, करौली अर अलवर मांय रात रो तापमान 3 डिग्री सेल्सियस सूं नीचे रहयो झुंझुनूं फलौदी अर सीकर रा पलसाना मांय केई ठौड़ां माथे फसलां माथे बर्फ री हल्की परत जमीं वठी ने जैसलमेर अर कोटपूतली-बहरोड मांय गाड़ियां माथे भी बर्फ री हल्की परत निजर आई मौसम महकमा रे मुजब इण टेम रात रे सागे दिन मांय भी ठिठुरन व्हे री हैं ठण्डी हवावां री वजह सूं दिन रो तापमान सामान्य सूं 5-6 डिग्री सेल्सियस नीचे दर्ज कर्यो जा रहयो हैं इण सूं केई हलकां मांय कोल्ड डे रा हालात बण रिया हैं इण बीच मौसम केन्द्र जयपुर रा निदेशक राधेश्याम शर्मा बताया के प्रदेश री न्यारी-न्यारी ठौड़ां माथे शीतलहर रा हालात हाल भी जारी रह सके हैं

राधेश्याम शर्मा

कड़ाका री ठण्ड रे चालता जयपुर समेत 11 जिलां मांय स्कूल री छुट्टियां बढ़ा दीनी हैं वठी ने कुछेक जिलां मांय स्कूलां रो टेम बदल दियो हैं

000

मुख्यमंत्री भजनलाल शर्मा कया के युवावां री ऊर्जा अर शक्ति सूं ही विकसित भारत अर विकसित राजस्थान रो सपणो पूरो कर्यो जा सके हैं वे कया के राज्य सरकार युवावां रा सपनां ने पूरो करबा अर वां ने मजबूत बणाबा खातर कमर कस राखी हैं श्री शर्मा आज मुख्यमंत्री रेहवास माथे सार्वजनिक हलकां मांय रुचि राखबा वाळा पढणियां सूं बजट पहली री चर्चा कर रिया हां मुख्यमंत्री कया के राज्य सरकार मोट्यारां मांय कारोबार ने बढ़ावो देबा खातर केई महताऊ कदम उठाया हैं वणा कया के 3 लाख सूं बत्ता मोट्यार ने माली हलका रो कौशल प्रशिक्षण दियो गयो राज्य सरकार कानी ऊं करीब 2 लाख युवावां ने इंटरनेशिप, 65 आई स्टार्टअप, लॉन्चपैड नेस्ट री थापना अर 658 स्टार्टअप्स री इमदाद दी गई

000

उपमुख्यमंत्री दिया कुमारी कयो के राज्य सरकार आपरी सगळी योजनावां ने धरातल माथे ला री हैं वणा आज अजमेर रा किशनगढ़ मांय जनता रा नुमाइंदा अर न्यारा-न्यारा समूहां सागे बातचीत करबा रे पछे खबरनवीसां सूं बातचीत मांय कया के राज्य री भजनलाल सरकार काम कर र दिखाबा री इच्छा राखे है अर आवण वाळा बजट मांय जो भी ऐलाण कर्या जावेला, सरकार उण ने पूरी करेलां

उपमुख्यमंत्री कया के केन्द्र कानी ऊं लाई गई विकसित भारत जी राम जी योजना सूं गांवाई माली व्यवस्था ने बढ़ावो मिलेला अर पूरी साफगोई रे सागे स्थाई विकास रा काम व्हेलां

000

राज्यपाल हरिभाऊ बागडे 78वां सेना दिवस रे मौके जयपुर मांय लगाई गई 'नो योर आर्मी' प्रदर्शनी रो आज जायजो कर्यों इण दौरान वणा सेना री ताकत, तकनीकी क्षमता अर शौर्य प्रदर्शन री सराहवना करीं वणा कया के सैनिक रो सम्मान म्हाको दायित्व हैं राज्यपाल भारतीय सेना कानी ऊं राखी प्रदर्शनी री सराहवणा करता थकां कया के आम जनता ने फौज रा हथियार, तकनीक, कार्यप्रणाली अर जवानां रा शौर्य री जाणकारी देबा री दिशा मांय या महताऊं पहल हैं इण बीच, काल जयपुर मांय सेना दिवस परेड री तीजी फुल ड्रेस रिहर्सल व्हेलां जगतपुरा मांय महल रोड़ माथे होबा वाळी इण रिहर्सल मांय भारतीय सेना रा साहस, पराक्रम, अनुशासन अर आधुनिक युद्ध क्षमता रो जीतो जागतो प्रदर्शन देखबा ने मिलेलां इण मांय स्वदेशी तकनीक सूं विकसित मिसाइलां, टैंक अर हथियारां रो प्रदर्शन करयो जावेलां साथे ही जल, थल अर वायु-तीन्यू मांय सेना री सामरिक शक्ति रो प्रदर्शन व्हेलां इण वास्ते सामान्य प्रशासन, पुलिस अर जिला प्रशासन अर इण जुड्या महकमा रा अहलकार आया हैं आमजन इण रिहर्सल ने देख सकेलां

000

पर्यटन महकमा री ओर ऊं जयपुर मांय 14 जनवरी ने काइट फेस्टिवल राख्यो जावेलां पर्यटन आयुक्त रुकमणी रियाड़ रे मुजब इण मौके मुख्यमंत्री भजनलाल शर्मा अर उपमुख्यमंत्री दिया कुमारी मौजूद रेहवेलां ओ फेस्टिवल जलमहल री पाळ माथे व्हेलां इण रे तैत लोक कलाकारां कानी ऊं सांस्कृतिक प्रस्तुतियां, पतंगां री प्रदर्शनी, पतंग बणाबा रो लाइव प्रदर्शन अर फैंसी पतंग उड़ाबा रो खास तरीको दिखायो जावेलां सिंज्या साढे 6 बज्यां रे पछे कार्यक्रम रा दूजा फेर मांय लालटेन उड़ाबा रो प्रदर्शन वेलां इण रे पाछे हवामहल री ऐतिहासिक पृष्ठभूमि मांय भव्य आतिशबाजी करी जावेलां

000

पाली जिला रा 45 प्रगतिशील काश्तकारां रो दळ आज गुजरात अर महाराष्ट्र रा दौरा माथे रवाना व्हीयों कृषि संयुक्त निदेशक रमेशचंद्र आमेटा इण दळ ने हरी झंडी दिखा र रवाना कर्यां आत्मा परियोजना रे तैत राखी सात दिन री इण यात्रा रो लगस काश्तकारां ने खेती री नुवी तकनीकां अर उन्नत पद्धतियां री जाणकारी देणो हैं दौरां रे तैत काश्तकार न्यारा-न्यारा कृषि विश्वविद्यालय, अमूल डेयरी अर जलगांव रा सिंचाई संस्थान रो जायजो कर्यां इण सूं वांने आधुनिक खेती अर खाबा री चीजां रा बारा मांय बारीकी सूं समझबा मांय मदद मिलेलां

000

केंद्रीय पर्यावरण, वन अर जलवायु परिवर्तन मंत्री भूपेंद्र यादव कया के प्राथमिक कृषि ऋण समितियां रा मजबूत नेटवर्क री वजह सूं देश किणी भी वैश्विक आर्थिक संकट सूं निपट सके हैं इण नेटवर्क मांय 32 करोड़ लोग भेळा हैं भारतीय चार्टर्ड अकाउंटेंट्स संस्थान रा 'सहकारी चिंतन शिविर' मांय केंद्रीय मंत्री कया के सहकारी समितियां सूं माली विकास ने बढ़ावो मिल रियो हैं श्री यादव कया के सहकारी हलका सामाजिक मजबूती अर समावेशी विकास मांय महताऊ भूमिका निभावे हैं

000

प्रधानमंत्री नरेन्द्र मोदी 25 जनवरी ने आकाशवाणी रा "मन की बात" कार्यक्रम मांय आपरा विचार साझा करेलां ओ इण मासिक रेडियो कार्यक्रम री 130वीं कड़ी व्हेलां इण खातर सुझाव टोल-फ्री नम्बर 1800-11-7800 माथे भेज्या जा सके हैं नरेन्द्र मोदी एप अर माय जीओवी ओपन फोरम रे मार्फत भी विचार भेज्या जा सके हैं अ सुझाव 23 जनवरी तांई मंजूर कर्या जावेलां

000

खास समाचार एकर फेर ऊं-

- प्रदेश मांय स्वामी विवेकानंद री जयंती राष्ट्रीय युवा दिवस रे मौके न्यारा-न्यारा कार्यक्रम व्हेला- जयपुर मांय राज्य स्तरीय जळसा मांय मुख्यमंत्री भजनलाल शर्मा एक लाख सरकारी भर्ती रो कैलेण्डर जारी कर्यों

- केन्द्रीय बजट 2026–27 आवती 1 फरवरी दीतवार ने लोकसभा मांय पेश कर्यो जावेलं
- राज्य मांय केई ठौड़ां माथे शीतलहर चालबा सूं कड़ाका री ठण्ड रो दौर–13 शहरां मांय पारो 5 डिग्री सेल्सियस सूं नीचे
- जयपुर मांय 14 जनवरी ने “काइट फेस्टिवल” राख्यो जावेलं